

大清世宗憲皇帝實錄



大清世宗敬天昌運建中表正文武英明寬仁
信毅大孝至誠憲皇帝實錄卷之六十一

監修總裁官光祿大夫經筵講官太保議政大臣保和殿大學士兼兵部尚書總理兵部事三等伯加十五級臣鄂爾泰

總裁官光祿大夫經筵日講官起居注太保兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣學士事務禮部尚書仍兼管太常寺鴻臚寺事臣三泰等奉

敕修

雍正五年丁未九月甲寅朔賑福建永定縣

水灾饑民○乙卯遣官祭

歷代帝王○遣官祭城隍之神○諭各省督

撫等民生日用所需制錢最爲切要朕特爲
便民起見屢頒諭旨嚴禁銷燬制錢竝令京
城及各省督撫駐劄之省城不許鑄造黃銅
器皿三品以下官員及兵民人等不得私用
此朕欲期錢文豐裕爲小民易於資生非朕
有所需用也已曾諄切詳諭不啻再三京城
現今奉行錢價已覺稍平乃近聞各處督撫

駐劄之省城銅器店內仍用黃銅鑄造者甚多此明係各省督撫不實力奉行徒以告示曉諭虛文掩飾而已朕向因錢局鼓鑄日增而錢文日見短少即知有銷燬制錢鑄造銅器之弊嗣於京城內屢次拏獲銷燬制錢之姦民而欽差官員至甘肅地方亦見有燬錢爲器者省會乃督撫駐節之區耳目最近政令易行非若遠鄉僻壤之難於稽察也若果實心遵奉甚屬易事朕爲制錢籌畫宵旰焦

勞各省地方官辦運銅餉亦甚費經營跋涉之苦然後官局得以鼓鑄錢文以資百姓之用夫以鑄錢如此之難而姦棍貪財射利竟將已成之錢復行銷燬故禁用黃銅者所以杜燬錢之源也今特再加訓誡各省督撫務宜實力奉行儻仍前疎忽定將督撫嚴加處分至從前曾斟酌三品以上許用黃銅器皿今覺濫用者多嗣後惟一品官員之家器皿許用黃銅餘者通行禁止○旌表山西聞喜

縣烈女張漢英女張氏守正拒姦被刃殞命
給銀建坊入祠致祭如例○丙辰工部議覆
河道總督齊蘇勒疏。審革職同知李世彥等
分賠江南睢寧縣朱家口漫坍工程銀兩。應
如所請。得旨。河工追賠之項。其中情由不一。

有該員侵蝕入己者。有修築草率。本不堅固。
易致衝決。應當賠修者。有當潰決之時。該員
預知例當賠修。而以少報多。先留地步者。甚
至有故意損壞工程。以便興修開銷者。種種

積弊不可枚舉。但亦有經手之員本無情弊。而照例則應分賠者。在該員情稍可原。而承追之時無力全完。亦於國帑無益。朕意欲開恩。稍爲變通。其如何酌量分別定例之處。著九卿詳議具奏。尋議嗣後除侵蝕浮冒損壞工程等弊。仍照定例遵行外。至黃河一年之內。運河三年之內。隄工實係堅固。已經題報。而陡遇衝決者。止令承修官賠修四分。如該員修築已完。未及題報。陡遇衝決者。該總河

督撫查無浮冒。據實保題。亦令賠修四分。其餘六分俱准開銷。其黃河一年。運河三年之外。隄工陡遇衝決。而防守各員實無疎虞懈弛者。該總河督撫查明。令防守道廳千把等官共賠四分。其餘六分准其開銷。所有承修防守各員俱令革職留任。戴罪効力。工完准其開復。總河督撫保題不實者。查出嚴加議處。從之。○陝西西安將軍貝勒延信來京。陛見。命大學士侯富寧安署理陝西西安將軍。

○丁巳以順承郡王錫保管理正紅旗漢軍都統○戊午諭戶部前商人胡嘉佩等虧欠帑銀開出朝鮮國人賒欠銀六萬餘兩以抵公項朕恐開報不實或有累及外國之處故令行文詢問竝令內地貿易之人與朝鮮賒欠之人在中江地方質對明白使中外之人不得互相推諉以息擾累今據盛京禮部奏呈朝鮮國王李昫咨文支離巧飾則該國之人欠銀之處顯然矣本應照議政所議按數

追還朕思當日朝鮮已故國王李燾才幹優
長政令嚴肅深蒙

聖祖仁皇帝眷注嘉獎李燾曾將伊國負欠之
人正法想見其辦事之公明向聞李吟柔懦
無能觀此咨文推託牽強必其陪臣所爲非
該國王語氣似此清查積欠之事該國王不
能辦理今若以不能辦理之事委之甚非朕
柔遠之意此案不必質對其朝鮮國人應還
之銀著從寬免追此朕加恩於外藩竝非疎

法於內地也。至從前該國王李燉理民馭下之善。朕至今思之。○江南江蘇按察使徐琳緣事革職。擢兵部員外郎覺羅白清爲江南江蘇按察使司按察使。○刑部議覆左侍郎海壽奏言刑曹現審事件均係奉旨所交緊要之案。理宜專員分理。請於臣部十四司內揀選滿漢司官各六員分隸左右二司并飭禮部鑄給現審左右二司印各一顆。應如所請。從之。○己未。諭議政王大臣等康濟鼎屬

下厄魯特等原係青海之人。曾降旨與達賴喇嘛令將此等人交割都統馬喇。內閣學士僧格移於青海地方居住。爾等行文與岳鍾琪將四川布政司庫銀動用一萬兩酌派官兵送往西藏。交與馬喇。僧格備辦口糧賞移居之厄魯特等。○免江南溧陽無錫二縣雍正四年分水災額賦有差。○庚申諭議政王大臣等前因達鼐報稱康濟鼐被擒之信恐策妄阿喇布坦有窺伺西藏之意。是以降旨

令陝西各路及四川雲南各派兵馬預備以
候調遣。今康濟鼎被害情由係西藏噶隆等
彼此不睦自相殘害之小事。不須用兵。著將
各路兵馬停止。不必預備。○理藩院奏稱青
海貝子噶爾丹代青諾爾布病故。無人承襲。
伊妻請以姪貝子達錫策零兼襲伊夫世職。
查貝子無兼襲兩職之例。應無庸議。得旨。噶
爾丹代青諾爾布於青海羅卜藏丹津之事。
著有功績。因議叙封爲貝子。今既病故。伊兄

弟兩家止有貝子達錫策零一人著從優加
恩并兩貝子職晉封爲貝勒世襲罔替○辛
酉太常寺卿王克莊緣事降調陞右通政劉
聲芳爲太常寺卿○以鑲白旗滿洲副都統
宗室圖納兼理鑲白旗漢軍都統事○壬戌
上以重陽令節御正光明殿賜諸王大臣宴
及緞疋有差并以雍正四年重陽慶宴柏梁
體詩墨帖頒賜諸王大臣及翰詹等官直省
督撫學臣各一冊○以故阿霸垓固山貝子

策伶東洛卜孫齊旺襲爵○癸亥諭大學士
等弭盜安民乃爲治之首務但緝盜之例最
難於斟酌盡善如立法稍嚴似可防盜犯漏
網之虞杜地方官諱匿不報之患然上司督
責州縣州縣督責捕役按期處分勒限責比
過於迫切人多顧惜考成巧圖脫卸勢必有
誣陷冤濫之事如立法稍寬似可詳籌緝捕
免累無辜然又恐州縣視同膜外漫不經心
捕役玩法養姦盜風愈熾此緝盜設法之難

也。至於失事之家。往往亦有張大其詞者。或以少爲多。或以竊爲強。甚至扳害平人。洩其私憤。扶制官長。任意肆行。此又報盜之弊也。以上種種情形。朕皆知之甚悉。今覽田文鏡奏摺。豫省地方有全無影響。而捏報被盜者。有別因事故。而託稱盜案者。有以竊爲強。欲快其挾制之私者。有以口角微嫌。遂報被盜。欲逞其刁誣之計者。既有如此惡習。法當嚴加禁止。但思若嚴捏報被盜之處。分刁詐者。

固知斂跡。恐謹良者必至不敢報盜矣。朕實難之。夫弭盜之法。貴乎至公至平。寬嚴輕重之間。皆須斟酌得宜。俾盜犯不能漏網。平民不致拖累。官吏皆盡緝盜之責。而不敢任意以失實。事主得伸被盜之苦。而不敢借端以滋擾。如此匪類方知儆懼。而良民悉得寧居。爾等可會同九卿科道。及部曹內。曾經外任年久者。悉心酌議。務期妥協。并將田文鏡摺奏詳議具奏。○吏部議覆河南總督田文鏡